

I. N. D. O. M.

DISSE⁴TATIO HISTORICO-PHILOLOGICA
TENTAMEN

VINDICIARUM
LITTERATURÆ
HEBRAICÆ
SISTENS,

Cujus

PARTEM POSTERIOREM,

Consensu Ampliss. Facult. Philos. Reg. Acad. Aböensis,

AUCTOR

LAURENTIUS O. LEFRÉN,

PHIL. MAG. & DOCENS,

RESPONDENTE

OLAVO N. NORDLIN,

SMOLANDO,

Publicæ bonorum censuræ modestè subjicit,

In Auditorio majori, die XIII. Sept. Anni


MDCCLV.

Horis ante meridiem solitis.

ABOÆ, Impressit DIRECT. & Typogr. Reg. Magn. Duc.
Finland. JACOB MERCKELL.

Psalms. LXVIII: v. 27.

בְּמִקְהָלוֹת בָּרְכוּ אֱלֹהִים אָרוֹן מִמְּקוֹר יִשְׁרָאֵל



L. N. D.

§. X.

HAec tenus eorum diluimus exceptiones, qui Hebraismum ideo negligendum opinantur, quod falso sibi persuadent, ad sufficientem ejus perceptiōnēm tantum temporis requiri, ut quisquis eandem rite adsequi voluerit, necesse habeat, aut prorsus negligere, aut primis duntaxat labris gustare cetera disciplinarum genera, quibus ut sedula & gnava impendatur opera, ratio vitæ, vel temporalis, vel spiritualis, non tam postulat, quam flagitat. Nunc vero, ut coeptam pertexamus telam, ordine lustrare convenit reliqua effugia adversariorum, ad quæ continue semet recipere solent, cum aptiora inscitiae præsidia invenire nequeunt. Hic itaque sub examen revocare placet tritissimum eorum argumentum, quod ex *avie patrois* Patrum desumunt, uti docuimus paulo superius, ubi illud, salva veritate, inverti posse diximus, itaque fecimus. Ratio enim instituti postulat, ut ibi a nobis nihil gratis, neque dictum, neque factum esse, hīc idoneis argumentis evincamus.

G Eone,

Pone, doctores Ecclesiæ antiquæ, absque peritia Hebraismi, in omnibus partibus Theologiæ haud contemnendam adquisivisse intelligentiam; non tamen est dubium, quin longe solidiorem veritatis cognitionem adsequi potuissent, si reliquis subsidiis, quibus instructi erant, adcuratam scientiam authentici Scripturæ instrumenti ipsis adjicere licuisset. Unde facile intelligitur, quam misera uantur Logica, cum hoc modo imperitoribus persuadere conantur, supervacuam esse diligentiam, qua prudentiores rerum æstimatores, studium nostrum excoli debere, contendunt. Nam aut valde fallimur, aut perinde argutantur, ac si quis eo stoliditatis progrederetur, ut vel oculorum necessitatem ex eo capite in dubium vocaret, quod scriptum viderit, fuisse homines luminis expertes, qui colorum varietatem sensu tactus dignoscere valuerint; (a) vel manuum utilitatem eo nomine negatum iret, quod relatum audiverit, exstitisse nonnullos brachiis mutilatos, qui varia manuum

officia

(a) Hujusmodi exempla in commentariis naturæ consistorum paßim occurruunt & nominatim apud Boyleum & Digbæum, quorum ille in Tractatu de Coloribus Cap. III. cæcum fuisse refert, qui ope tactus omnes distingvet colores, præter rubrum & nigrum, quos subinde dicitur confusisse; hic vero de Nat. Corp. Tract. I. cap. 28. alium meminit, qui, licet adeo captus esset oculis, ut ne solis quidem lumine moveretur, pictis tamen chartis peri te admodum ludere potuerit.

officia pedibus exsequi potuerint. (b) Finge vero, hæc lumina Ecclesiæ eclipses errorum nunquam passa fuisse, sed semper tam claros vibrasse radios, ut corruptores atque impugnatores religionis vix unquam veritati adeo crassas offuderint tenebras, quin iisdem penetrandis atque dispellendis suffecerint; quis tamen exinde, salvis Logorum regulis, probare sustinebit, nostrum studium hodiernis Theologis ad decidendas controversias nihil plane adjumenti adferre? Nonne diversorum temporum diversa est ratio? Et sane, si tales concludendi leges constituerentur, vereor, ne illud sequeretur absurdum, omnia tandem inutilia recte dici posse, quibus venerabilem antiquitatem quodammodo carere potuisse, liqueret. Si vero hoc admiseris, nihil obstare videtur, quominus adfirmare possimus, omnes inanem capere laborem, qui hodie in fabricis gladiorum & bombardarum sudant, quandoquidem ex monumentis historicis constat, quod priscorum temporum ho-

G 2

mines

(b) Fuerunt qui, palmis amissis, cibum & potum ori adrovere, tuba canere, barbam abradere, calamos parare, litteras scribere, chartis & tesseris ludere, colum & acum trahare, lacinias contexere, arcum tendere, scopum ferire & alia id genus manuum officia pedum ministerio admodum expedite exsequi potuerunt, referente Laur. Alstrin, hujus Academiæ Professore quandam celeberrimo, in Dissert. de Altera Natura Part. I. pag. 70. & 71. Conferantur Auctores, quos ille laudat, Jonstonius, Ponticus, & Le Montagne.

mines hostium suorum impetum fundis & clavis
quodammodo excipere atque sustinere potuerint.
(c) Quid? quod universus etiam adparatus instru-
mentorum œconomicorum, quæ industria recen-
tiorum invenit, quæve hodie incredibilis sunt ne-
cessitatis, hoc pacto in suspicionem inutilitatis fa-
cile adduci posset. Potest vero quidquam cogita-
ri absurdius? Ego quidem non putaverim, ullum,
nisi cui caput cerebro vacuum fuerit, tam ine-
ptam sequelam vel per somnium esse admissurum.
Quoniam igitur syllogismus ille hypotheticus, quo
utuntur adversarii, non probat quod erat proban-
dum, cum conditio, qua nititur conclusio, vera
ponitur, uti modo evicimus; facile quisque videt,
quid accidere debeat, si falsitas ejusdem necessa-
riis argumentis omnibus ob oculos posita fuerit,
quod nos in sequentibus pro virili facere conabi-
mur.

§. XI.

PRimum quidem ex eo capite illegítima est con-
sequentia, quod multi Patrum veritatem pro-
positionis antecedentis in dubium vocare viden-
tur, quippe qui claris verbis usum nostri studii
agnovisse reperiuntur, quod non potuissent face-
re, si contrarium sibi perswasum habuissent. Ne
vero

(c) Vide, si placet, Dissertationem de Tumultu Rustico
Ostrobothniæ Civium, Klubbe-Kriget vulgo dicto, eujus pars
prior paucis ante annis hic prodit, sub auspiciis Cele-
berrimi nostri Antiquarii, Ampliss. Dn, Prof. & Biblioth.
ALGOTHI A. SCARIN.

vero hoc gratis adseruisse videamur, haud abs re
fuerit ipsissima eorum testimonia in medium pro-
ferre. JOHANNES CHRYSOSTOMUS, qui ob mi-
ram dicendi ubertatem, svavitatemq; DEMOSTHENES
CHRISTIANORUM audit, ut longe gratius, inquit, po-
mum, quod tuis manibus ex ipsa arbore decerpseris,
vinum jucundius, quod ex eo deppromseris dolio, in quo
primum fuerit conditum: ita Divine Litteræ nescio
quid habeant Divine fragrantie, nescio quid spirent
suum & genuinum, si eo sermone legantur, quo scri-
pserunt ii, qui partim e Sacro hauserunt ore, partim
ejus adflati spiritu nobis tradiderunt. (d) HILA-
RIUS PICTAVIENSIS, quem LATINÆ ELOQUENTIÆ
RHODANUM vocant, frequenter, ait, admonuimus, non
posse satisfactionem intelligentie ex Latinitatis transla-
tione praestari. (e) MAGNUM ILLUD AFRICÆ DECUS, AU-
RELIUS AUGUSTINUS, quamvis ipse, temporis
iniquitate impeditus, delicias Hebraicas gustare non
potuerat, rei tamen veritate adactus de utilitate
earundem vere augustum tulit judicium. Latinæ
quidem lingvæ homines, inquit, quos nunc institu-
endos suscepimus, duabus aliis ad Scripturarum Divi-
narum cognitionem habent opus, Hebræa scilicet &
Græca, ut ad exemplaria præcedentia recurratur, si
quam dubitationem adulterit Latinorum interpretum
infinita varietas. (f) Item: Recte fieri nullo modo
dubitaverim, ut cum diversum aliquid in utrisque

G 3

codi-

(d) Homilia LXXIX, in Matthæum.

(e) in Psalm. CXVII.

(f) De Doctrina Christiana Libro II, cap. XI.

codicibus invenitur, quandoquidem ad fidem rerum gestarum utrumque esse non potest verum, ei linguae potius credatur, unde est in aliam per interpretes facta translatio. (g) Et rursus: Ut veterum librorum fides de Hebreis voluminibus examinanda est: ita novorum veritas Græci sermonis normam desiderat. (h) Omnium vero sæpiissime & gravissime usum Hebraismi commendat HIERONYMUS STRIDONENSIS, qui etiam optime hujus caussæ arbitrum atque sequestrum agere potuit, cum citra controversiam in hac Litteratura omnium Patrum versatissimus fuerit. Ita vero ille: *Sicut in Novo Testamento, quando apud Latinos quæstio oritur, & est inter exemplaria varietas, recurrimus ad fontem Græci sermonis, quo Novum scriptum est Instrumentum: ita in Veteri Testamento, si quando inter Græcos Latinosque diversitas est, ad Hebream recurrimus Veritatem, ut quidquid de fonte proficiscatur, hoc queramus in rivulis.* (i) item: multo purior manare credenda est fontis unda, quam rivuli. (k) Et rursus: *In hunc locum nostrorum multi multa dixerunt & inter se dissonantia.* Cogimur igitur ad Hebræos

(g) De Civitate Dei Libro XV. cap. XIII.

(h) Epistola VIII. ad Hieronymum, si fides Sextino Amama in Præfatione. Antib. Bibl. Alias eadem verba adducit Hieronymus in Epistola ad Lucinum, teste Joh. Gerhardo in Methodo Studii Theologici Cap. I. pag. 45. Adlegantur quoque in Jure Canonico Distinctione XI.

(i) Epistola XXXV. ad Suniam & Fretellam.

(k) Adversus Helvidum Tom. III.

bræos recurrere & scientie veritatem de fontibus magis, quam de rivulis quererere. (l) Alibi scribit, se tanquam ad arcem quandam & præsidium, sic ad Hebræam veritatem solitum esse confugere. (m) Sexcenta hujusmodi testimonia ex scriptis Patrum in rem nostram adducere possemus, nisi vel ex his satis constare arbitraremur, quantum illi pretium notitiæ fontium statuerint, quamque vanus sit fucus, quem ineptis suis placitis illinere co-nantur adversarii Lingvæ Sanctæ, ut horum ignorantia suam excusent negligentiam. Nec est, quod nobis objicias, fuisse inter Patres, quibus de nostro studio sinistra quedam judicia interdum exciderint. Hæc enim, si quid videmus, non ex veritate, sed ex opinione profecta sunt, ut infra ostendemus, cum ad caussas inscitiae Patrum in Hebraicis deuentum fuerit. Quod vero Patres longe modestius de scientia sua Theologica senserint, quam ut, omne se punctum tulisse, crederent, itidem ex scriptis eorum luce clarius constat. Exempli gratia nominasse sufficiat AUGUSTINUM, qui in præstantissimis habetur. (n) Is enim errorum, quos commisit, & quorum magnus certe numerus ex imperitia Lingvæ Sanctæ originem duxit, retractationes certis comprehensas

(l) Commentario in Zachariæ cap. VIII. v. 6.

(m) Epistola ad Viralem.

(n) B Lutherus in libro περὶ τῆς ὑπὲρ Augustino testimonium perhibet, quod Ecclesia Christiana post Apostolos doctorem ipso Præstantiorem non habuerit.

hensas libris instituit. (o) OPTATUS MILLEVITANUS coram ipsis adversariis suis in hæc verba erupit: *Nemo vobis credat, nemo nobis: omnes contentiosi homines sumus.* (p) Alii multi eundem ostenderunt candorem, quorum nomina & effata adduceremus, nisi brevitati esset serviendum.

§. XII.

NE vero quis jure suspicari possit, verba nobis dedisse Patres, quorum mentem de utilitate Hebraismi jam paucis exposuimus; ab instituto alienum non fuerit docere, multos eorum re ipsa satis demonstrasse, quam longe abfuerint a contentu nostræ studiæ, quem aliis adfricare deprehenduntur, qui, nescio quo errore seducti, sua magnopere putant interesse, si ostendere valeant, hæc lumina Ecclesiæ studium sæpius laudatum in rebus minimi momenti posuisse, perinde ac si vestitas errori patrocinium parere posset. (q) Constat vero inter omnes, qui historiam litterariam istorum temporum tradiderunt, nunquam prorsus defuisse,

(o) Negare, inquit, nec possum, nec debeo, sicut in ipsis majoribus, ita multa esse in tam multis opusculis meis, quae possunt justo iudicio, & nulla temeritate cœlpari. Libro II. ad Vincentium. Et: Noli meis litteris tanquam canonicis deseruire. Proleg. ad Libr. III. de Trinitate.

(p) Libro V. de Schismate Donatistico.

(q) Egregie & nervose Tertullianus: *Veritatis nemo praescribere potest, non spatium temporum, non patrocinia personarum, non privilegia regionum.* De velandis virginibus sub inicio.

defuisse, qui in studium litterarum Hebraicarum pro virili incubuerint, quamvis simul fatendum, hoc in plerisque, quos eo nomine laudare solent auctores, non tam ex effectu, quam adfectu spectari debere, ob rationes, quas haud ita multo post adlaturi sumus. Inter omnes autem Patres, qui Hebraismo addiscendo aliquam certe operam navasse communiter traduntur, primus ponitur ORI-GENES, etsi non desunt, qui argumentis non contempnendis probare conantur, doctorem *Admantium* ne primis quidem labris ambrosiam Hebraicam gustasse. (r) Hujus familiarem, SEX-TUM JULIUM AFRICANUM, peritia Lingvæ Hebraicæ tinctum fuisse, ex variis viri scriptis collegerunt maximi nominis Philologi. (s) Idem plures tradunt auctores de LUCIANO SOMOSA-TENO, HESYCHIO MILESIO, DOROTHEO TY-RIO, EPIPHANIO PALÆSTINO, (t) EPHÆRMO

H

SURO

(r) Hoc post Ruffinum & Dionysium Petavium adfir-mat JOHANNES IHRE, Professor Upsalensis Celeberrimus, in Cognitionibus Philologicis de Usu Accentuum Hebraico-rum Part. II. pag. 43+, ubi, se in scriptis ejus invenisse, dicit, omnimodæ cætitatis vestigia, suaque omnia partim a Judæo, e cuius ore hauserit sonum vocabulorum Hebrai-corum, partim a Philone mutuo sumississe, suspicatur.

(s) Videatur Valent. Ernest. Lœscheri Comment. de Caussis Lingvæ Hebrææ Lib. I. cap. VIII. §. 10.

(t) Hic ob peritiam quinque lingvarum, Hebraicæ, Græcæ, Syriacæ, Ægyptiacæ & Latinæ, Πεντάγλωσσος dicitur Hieronymo, apud J. A. Quenstedium l. c. pag. 523.

SURO, (u) APOLLINARIO identidem SYRO, HILARIO PICTAVIENSI & aliis. Nec defunt, qui ULPHILAM, Gothorum in Thracia Episcopum, in Litteris Hebræorum versatum fuisse, arbitrantur, adeoque celebrem Bibliorum versionem, quam posteritati reliquit, ex ipsis fontibus adornasse. (v) Ex Patribus vero nemo, quod scimus, plus laboris atque sudoris Litteraturæ Hebraicæ insumisit, quam HIERONYMUS, presbyter Stridonensis. Is enim ab ineunte juventute ad effætam usque senectam nullis nec vigiliis, nec impensis pepercit, ut hujus sibi cognitionem compararet. Nec conatui defuit eventus. Tantum enim thesaurum in hoc genere eruditionis adquisivit, ut si cum eo confefantur ceteri, quorum mentionem injecimus, ne hilum profecisse videantur. Fateri tamen cogimur, virum magnum eo progredi non potuisse, ut æquiparari queat illis, qui post renatas

(u) Ephræmum adpellatum fuisse נבואה דסוריא, Prophetam Syriæ, tantique a suis habitum, ut ipsius scripta, post lectionem Scripturarum, in Eccles publice prælegerentur, accepimus. Vide Dissertac. Erici Tegmanni de Fatis Studii Hebræo-Biblici apud Christianos pag. 22. & laudatio modo Quenstedium l. c. pag. 606.

(v) Hoc nomine eum laudat B. Episc. JOHANNES ENBERGIUS, qui illud elicit ex verbis Hieronymi, quæ opp. Tom. II. pag. 53. ita jacent: *Quis hoc crederet, ut barbara Gotthorum lingua Hebraicam quaereret veritatem?* Vide laudatio auctoris Tractatum Svecanum, cui titulum fecit, Be-skrifning om Gamla Upsala, pag. 59.

renatas bonas litteras vel mediocriter in hac arena desudarunt, ne dicam, principatum in hoc studiorum genere tenuerunt. Obstant enim frequentes illæ frustationes, quæ pulchra viri scripta, haud secus ac atræ quædam maculæ, deformant, (w) quarum tamen pleræque, nisi omnia nos fallunt, non tam culpæ hominis, quam vitio temporis, quo vixit, tribui debere videntur. Nam si hodiernis discendi subsidiis ipsi licuisset uti, nec in tam ineptos artis magistros incidisset, quales erant Judæi, quorum informatione erudiebatur, nulli dubitamus, quin hodiernis Philologis dubiam reddidisset palmam. Interea hoc satis habet laudis, quod, superatis sui ævi præjudiciis, tantam sibi famam peritia Hebraica parere potuerit, ut ad eum audiendum, tanquam ad communem Hebraismi præceptorem, ex omnibus orbis partibus confluenter discipuli, qui his studiis initiari cuperent, quodque sua ef-

H 2

fecerit

(w) Fuerunt, qui Sacri Labii mediocrem etiam cognitionem nostro denegatum iverunt, inter quos eminet JOH. CLERICUS in Quæstionibus Hieronymianis. Contra alii reperiuntur, qui ipsi tantum non omnimodam scientiam in huc genere eruditionis adscribunt. Si SCALIGERO credas, nemo majorem eruditionem & adparatum lingvarum ad translationem Scripturarum adulit post Hieronymum, quam HIERONYMUS. Videatur epistola, quam Is. Casaubonus epigrammatis ejus Græcis e Mertiale traductis præfixit. Celeberrimus vero CARPOVIUS pio viro quod æquum est tribuere videtur, cum ipsi pro ratione temporis haud vulgarem Hebraismi peritiam adserit, non tamen dissimulatis sphal-

fecerit industria, ut nectara Hebraica semet palato etiam femineo probare inciperent, ut supra verbo indicavimus, ubi Paulæ & Blæfillæ mentionem fecimus.

§. XIII.

PRæterea vel exinde licet videre, quam per svasum plerisque Patrum fuerit de necessitate hujus Litteraturæ, quod acerrimos fidei adversarios, magistros nimirum Judaicos, de sensu dubiorum Scripturæ locorum consulere non intermisserint, si quo unquam modo ad eosdem sibi aptum inventirent aditum. Quoties enim quæstio incidebat de potestate verborum Scripturæ, quæ ex versionibus, ob varios earum nævos, minus distincte intelligebantur, toties solenne erat provocare ad auctoritatem Hebræorum, cui idcirco haud exiguum statuebant pretium, quod illos claves hujus Scientiæ possidere intelligebant. (x) Nullo enim pacto, ut hoc facerent, a se impetrare potuissent, nisi, ex peritia Sermonis Originalis optima interpretandi subsidia peti posse, credidissent. Huc etiam

matis, quibus obnoxii esse solent, qui in pelago Disciplinarum glaciem, ut dicitur, frangere coguntur. Videatur Procem. Crit. Sac. V. T.

(x) *Ipsæ Origenes, & Clemens, & Eusebius, atque alii complures, quando de Scripturis aliqua disputant, & volunt adprobare quod dicunt, sic solent scribere: Referebat mibi Hebreus: Audivi ab Hebreo: Hebraeorum ista Sententia est. Verba sunt Hieronymi in Apologia adversus Ruffinum,*

jam spectat studium, quo Patres in suum usum convertere conabantur quidquid offenderent in Græcis Judæorum scriptis, quod ad hunc scopum quoque modo tenderet. Nam qui lucubrations veterum Ecclesiæ doctorum paulo diligentius evolverit, passim inveniet, quod easdem irrigaverint explicatiunculis, quæ occurunt apud Josephum, Philonem, & forte etiam alios, qui Græce scripserint, origine & religione Judæi. (y) Nec alia fuisse videtur caussa, quamobrem τοῖς ἐβδομήκοντας τὰς τρεῖς sæpius prætulerint, quam quod sentirent, multis se dubiis teneri, quamdiu authenticum Scripturæ instrumentum adhibere nequirent. Etenim cum interiora veritatis adyta ipsis non patarent; id agere consultum videbatur, ut in proxima saltem vestibula penetrarent, (z) paria cum illis facientes, qui non admissi intra fores curiæ,

H3

in

(y) Hinc factum videtur, ut multi Hebraice periti apud scriptores celebrentur, qui tamen vix rudimenta hujus lingvæ didicerant. V. c. CLEMENTI ALEXANDRINO cognitionem Lingvæ Hebr. ex hoc capite gratis tribuit Jos. Coopers, Sam. van Till, et forsan alii, cum tamen sua ex turbidis Philonis rivulis hauserit, quemadmodum ipse satetur Strom. Lib. I. p. 284. confr. Lib. V. p. 549. & Pædag. Lib. I. c. V. p. 85. Vide Laudatum IHRE I. c. pag. 48. & 49.

(z) Observavimus supra §. IV. lit. b. nonnullis Patrum fuisse pervasum, tres illos interpretes textum Hebraicum adcuratus vertisse, quam fecerant Alexandrini, quibus alii prope infallibilem tribuebant auctoritatem. In his fuit doctor Adamantius, seu ORIGINES. Hinc eum re-

in qua lis ipsorum disceptatur, atrium (*a*) intrant, auribusque ostio admotis, aliqua saltem verbula, quamvis confusa, ex ore judicum intus loquentium excipere conantur, ut, quo loco res suæ sint, utcunque possint colligere. Atque hinc iterum magna sit significatio, quo animo veteres erga Studium Hebraismi fuerint. Certe non omnes venerandos Patres neglectus, nedum contemtus litterarum Hebraicarum recte argui posse, ex iis, quæ hactenus adducta sunt, luce clarius constat. Hinc vero prono fluit alveo, vitiosam esse sequelam, unde osores Sacri Labii miseræ suæ caussæ patrocinium quærunt. Quis enim in regulis Logicis tam hospes esse potest, ut ignoret, toties errorem committi, quoties quis ex propositionibus particularibus conclusionem universalem ducit? Illud vero hic fieri, manifestum est. Huc enim reddit argumentatio: Quidam Patrum absque notitia Linguae Sanctæ egregiam Theologiarum notitiam adquirere

prehendit HIERONYMUS, quod versionem τῶν LXX. emendatus Textum Hebræum non consuluerit, sed eandem ex hominis Judæi, blasphemi Christi hostis, THEODOTIONEM putat, impuris rivulis corruperit. In Epistola ad AUGUSTINUM, teste Cel. IHRE loc. cit. pag. 44.

(*a*) Quos imperitia sermonis originalis versionibus contentos esse cogit, hi cum plebe in atriis stantes et longinquæ sacra contuentur; At qui Scripturam Authenticam legit & intelligit, cum Sacerdotibus in ipsa penetralia admissus omnium, qua intus aguntur, ipse arbiter & testis est. Vide Walæi orat. de Stud. Theol.

rere potuerunt; Ergo possunt omnes Sacri studii cultores hodie in eodem feliciter progredi, etiam si Camenas Hebraicas ne quidem e limine salutaverint. Certe in mare aquam quererere videtur, si absurditatem hujus conclusionis pluribus ostendere vellemus, quippe quæ tam crasso laborat vitio, ut vel manibus palpari queat. Verum nec hoc sequitur, quosdam hodie in studio Theologico rite versari posse, si omnimoda Hebraismi imperitia laborant. Hoc facile concedent omnes, qui cogitaverint, apertis indicis constare, falsam esse præmissam, unde precariam hanc sequelam eliciunt, quod modo sumus exposituri.

§. XIV.

Quod Doctores Ecclesiæ primitivæ scientiam suam Theologicam enormibus erroribus fœdarint, & id quidem propter ignorantiam Hebraismi, supra §. quarta adseruimus. Jam vero, ne Cassios Severos egisse videamus, hoc adsertum evidentiibus rationibus confirmare volumus, memores illius Hebræorum: **הַמּוֹצִיא מְחַכֵּרֶוּ עָלָיו חֲרָאִיה** i. e. *Actori incumbit probatio.* Primo itaque ostendum, quomodo versati fuerint in tractanda Theologia Exegatica, quæ Dogmaticæ necessaria substernit fundamenta, sine quibus neque existere, neq; subsistere poterit. Quoniam ignari sermonis originalis supponuntur, necesse omnino fuisse patet, ut omnia ex hecunis versionum haurirent. Cumque nemo dubitet, quin hæ se haberent ad Scripturam Authentica-

ticam *i. e. ut simia ad hominem;* (b) fieri non poterat, ut verum sensum Oraculorum Hebraicorum ubique locorum exacte adsequentur. Quin potius res inevitabilis necessitatis fuerit, ut subinde aliquid humani patarentur, praesertim sicubi occurrerent pertinaciores quædam difficultates, quæ neque ingenii lumine evitari, neque judicii acumine superari possent. Quoniam vero sensus Oraculi alicujus Biblici duplex statui solet, *Litteralis & Spiritualis* quorum ille ex verbis, hic ex rebus manat; a proposito alienum non fuerit selectis quibusdam exemplis ostendere, quod in utroque misere quandoque cæcūtient, quidvis potius, quam quod Spiritus Sanctus intenderit, adsecuti. Paucis vero nos contentos esse cogit festinatio. De singulis seorsim, & quidem de priori primum.

Primum Exemplum Gen. I: v. 26. his verbis proponitur decretum S. S. Trinitatis de creatione hominis: *נָשָׁה אָרֶם בְּצִלְמֹנוּ כֶּרֶתִותֵנוּ i. e. faciamus hominem in imaginem nostram, secundum similitudinem nostram.* Sensus est: *faciamus hominem in imaginem nostri persimilem.* Nam in Lingva San-

(b) Hoc sane superfluum esset demonstrare, cum tot opera Criticorum id dudum extra controversiam posuerint. Qui volet, adire poterit Crit. Sac. Cel. Carpzovii, qui Part. II. capp. II. III. IV. V. VI. hoc argumentum solide pertractat. Plures ibi citatos inveniet. Interea idem quodammodo prestatunt exempla, quæ hic a nobis adducenda veniunt, potissimum ex auctoribus antea laudatis.

Sancta cum duo synonyma conjuncta reperiuntur, alterum vicem adjectivi sustinet cum emphasi. (c) ut passim inculcant Grammatici. Hoc ignoravit BASILIUS, ideoque inter imaginem & similitudinem distingvendum putavit, illam referens ad *animam ratione præditam*, hanc ad *actiones Deo conformes*. (d)

Secund. Exempl. Gen. II: v. 7. primum in Sacris Litteris legitur Divinum nomen proprium יהוָה. Rationem hujus phænomeni redditurus TERTULLIANUS misere hallucinatur. Inhæret enim notioni, quæ τῷ Græcorum κὐεστῷ & Latinorum Dominus subjacet, (e) quæq; Hebræorum יְהוָה non melius convenit, ac ocrea capiti & galea pedi. Nam τῷ κὐεστῷ & τῷ Dominus involvunt respectum superioris ad inferiorem, nomen vero προφέτας, hoc est יְהוָה, innuit ipsissimam Summi rerum Arbitri essentiam, qua fuit, est & erit

I quid-

(c) Vide GLASSII Pilol. Sacr. Lib. III. Tract. I. Can. VI. Et STARKII Lucem Gram. Hebr. Part. II. Membr. I. §. LII.

(d) Qui varias variorum opiniones de notionibus harum vocum legere cupit, sæpius laudatum SIXTINUM AMAMA adeat, qui eas prolixius persequitur, l. c p. m. 179. & 180.

(e) Verba ejus ita sonant: *Quamdiu Deus fecit, quorum Deus futurus erat, Deus solummodo ponitur, & dixit Deus, & vidit Deus &c. nunquam abduc DOMINUS. At ubi universa fecit, maxime hominem, qui Dominum proprie erat intellecturus, DOMINUS etiam cognominatur.* Vide Lib. contra Hermogenem.

quidquid idea entis perfectissimi unquam comple-
titur, & ipso opere talem se præstat, qualem se
descripsit, adeoque a Diis factis tantum differt,
quantum veritas a falsitate.

Exempl. Tert. Gen. VIII: v. 20. exstat in T.
H. quod NOACHUS altare ædificaverit לִיהוּת, pro
quo Græci τὸ οὐρανόν & Latini *Domino* per errorem
scripserant. Hunc nævum interpretum suum fecit
AMBROSIUS, quod fontes adire nequivit. Erro-
rem boni viri confirmavit perswasio, quâ ipse etiam
τῷ Ιησού συντάκτως competere notionem dominii credebat. (f)

Exempl. Quart. Gen. XXXIV. v. 5. narratur
negotium Sichemi cum Dina Jacobi filia, dicit-
que T. H. וְעַקֵּב שָׁפֵעַ לְיִטְמָא אֶת דִּינָה בְּחוֹן i. e.
Et audivit Jacobus, quod stuprasset filiam suam Di-
nam. In Græcis vero Codicibus ita legitur: καὶ ἤ-
κουσεν Ἰακὼθ, ὃν εὐτάσσει ὁ νόος Εβραϊών Δένας τὴν θυγατέρα
ἀντεῖ. Duæ voces, ὁ νόος Εβραϊών, ad subiectum clarius
indicandum margini primum illitæ fuisse viden-
tur, deinde vero per imperitiam librariorum in
textum

(f) Hunc in modum de hac re philosophatur, vel po-
tius rhetoricitur: *Quod autem AEDIFICAVIT DEO, non AEDI-
FICAVIT DOMINO, secundum nominis interpretationem non coa-
cta videtur haec actio esse gratiarum, quasi DOMINO, sed vir-
tutis justi morigera & grata, quasi DEO. Quod imperiale est
sequestravit, quod beneficij nominavit.* In Lib. de Arca &
Noë cap. XXI'. Sic ἀερβατός, qui fontes adire ne-
queunt. Quanto verius & rectius hæc dicere potuisset vir-
pius, si veram lectionem fecutus & veras notiones adse-
cutus fuisset?

textum intrusæ, quamobrem lector quidam peritior easdem obelo confederat. Hunc cum PROCOPIUS GAZÆUS ad utramque pertinere ignoraret, alteram, וְאֶת, delevit, alteram, Εμμως, retinuit, indeque utrumque, & Patrem, & filium, cum Dina rem habuisse, falso cunclusit. Provocat ad verba Græca pluralis numeri εὐταῖας v. 13. & ἐγνῶνται v. 31. sed prorsus precario. Nam utrobiique in T. H. comparet numerus singularis. Vide S. AMAMA l. c. p. m. 270.

Exempl. Quint. Levit. XVIII: v. 21. hæc legitur sententia: וְטוֹרֵעַ לֹא תִתְנַצֵּחַ לְהָעֵבִיר לְמֶלֶךְ i. e. De semine tuo non dabis ad traducendum Moloch. Hic LXX. interpres perperam legerunt, לְהָעֵבִיר pro מֶלֶךְ, vocemque מֶלֶךְ non Molech, sed Melech extulerunt, Codice non punctato usi; unde talis profluxit translatio: καὶ αὐτὸς τὸ σπέρματός σου οὐ δώσεις λατρεύειν τῷ ἀρχοντὶ i. e. De semine tuo non dabis ad serviendum principi. Hic valde sudat AUGUSTINUS, ut verum loci sensum inveniat, sed oleum & operam perdit. Quidquid enim ex Græco verbo λατρεύειν eruere conatur, infumum abit. Primum enim, ut vidimus, illud non respondet לְהָעֵבִיר Hebræorum, quod genuinum, sed τῷ λατρεύειν, quod spurium est. Deinde si T. H. vel maxime haberet posterius, nihilo tamen magis solidum esset, quod pius Pater argutatur, quandoquidem verbum Hebræum עבד tam τῷ δολεύειν, quam τῷ λατρεύειν Græcorum respondet. (g)

(g) Verba ejus, Quæstione LXVI. in Leviticum,

Exempl. Sext. Psalmo CXIX: v. 109. occurrit formula: נֶפֶשׁ יְהוָה בְּמַחֲנֵבִים i. e. *Anima mea in manibus meis semper.* LXX. Interpretēs: ή ψυχή μας ἐν ταῖς χερσὶ μας διαταπτός. Hic ignoratio idiotismi Lingvæ Sanctæ librarios eo audaciæ adegit, ut κερδίσῃ σα, pro κερδόι μας, legerent. Hinc AUGUSTINUS: *Quidam Codices habent in manibus Meis, plures Tuis.* Et hoc quidem planum est. *Iustorum enim animæ sunt in manu Dei.* *Anima vero in manibus meis, quomodo intelligatur, ignoro.* (b) Similis locutio invenitur Jobi XIII: v. 14. *ubi anima in manibus geri dicitur,* quod GREGORIUS hoc modo explicat: *Qui intentionem suam per opera insinuat, animam suam in manibus portat.* Fallit vero & fallitur. Nam longe alius hic sensus latet. Significatur enim status periculi plenus. Unde *animam in manibus ponere est apertum periculum adire,* & *animam in manibus gerere est in præsenti vita discrimine versari.* (i)

Exempl.

sic habent: *Hic non video, quid intelligatur, nisi PRINCIPIS, qui pro Deo colitur.* Non enim ait δολεύειν, sed λατρεύειν in Graeco. Plurimum autem distant. *Nam servire hominibus, quomodo servi serviunt, quod non est λατρεύειν sed δολεύειν,* Scriptura non prohibet. *Servire autem secundum id, quod est λατρεύειν, non jubetur hominibus, nisi uni vero Deo.*

(b) Bene GENEBRARDUS apud. S. AMAMA A. B. L. III. p. 554. *Quod ignoravit AUGUSTINUS explicavit HIRONYMUS.* Et: *Multa ignorantur a lingvarum imperitis, quae peccati liquido intelligunt.*

(i) Recte Chaldaeus: *Anima mea periclitatur, ut si in*

Exempl. Septim. Psalm. XCII: v. 13. legitur mellita promissio Divina de flore felicitatis, qua fruuntur justi in hac vita, dum gratia Dei sic illis adest, ut quo magis premuntur, eo magis crescant. Verba T. H. ita sonant: צִיר כְתָמָר יַפְרֹת. LXX. δίναισθαι ὡς φοῖνξ ἀργήσει. Vulgatus: *Iustus ut palma storebit.* Omnes idem dicunt, statum justorum beatum fore, ad modum palmæ, quæ quo gravioribus premitur ponderibus, eo contentius & constantius frondosa sua brachia versus cælum extollit atque extendit. Latini vero, decepti ambiguitate vocis Græcæ, φοῖνξ, quæ & certam arborem, & fictum alitem significat, alium exinde sensum extorserunt, existimantes, mortuorum resurrectionem hoc loco probari, quod LACTANTIO, AMBROSIO, TERTULLIANO & aliis persuasum fuisse, legimus. (k)

Zeph. III: v. 18 in Hebræo sic legimus נָגִי מְמוּעֵד אֲלֶפְתֵו i. e. *Tristes ob solennitatem colligam.* Hæc ita interpretatus est HIERONYMUS: NUGAS, quæ a lege recesserunt, congregabo. Hanc vero subnectit observationem: *Id quod diximus nugas, sciamus in Ebræo ipsum esse Latinum sermonem נָגִי,* & propterea a nobis ita, ut in Ebræo erat, positum, ut

manu mea effet semper. Confer GLASSII Orat. de L. H. necessitate & utilitate.

(k) Vide hunc in Lib. de resurrectione carnis cap. XIII. illum in Oratione de fide resurrectionis, & istum in Carmine de PHOENICE, quod Libris Instit. Divinarum subiungi solet.

scire possimus, Lingvam Ebraicam omnium lingvarum esse matricem. Tom. VI. Opp. edit. Francofurt. p. 180 Quis sine misericordia hæc nugamenta leget? Certe tristior tristum interpretatio cogitari non potest.

§. XV.

ATque ex his liquido constare arbitramur, quam graviter Patres impegerint circa sensum Scripturæ litteralem. Jam ratio instituti postulat, ut paucis etiam ostendamus, quam felices fuerint in *sensu spirituali* investigando & demonstrando. Omnibus fere Patribus hoc vitium adhæsisse observamus, ut quoties verba versionum, quibus utebantur, vel tantillum haberent difficultatis, toties, deserta Scripturæ littera, plenis velis in fretis allegoriarum navigarint. Nam cum hujus generis argutiae speciem sublimioris cuiusdam eruditionis mentirentur; (*l*) mirum non est, si gregatim in sui amorem pellicerent atque pertraherent homines, quorum animi essent incerti, nec haberent, in quo adquiescerent, præfertim si natura plus ingenii, quam judicii adepti essent, adeoque vana gloriolæ aura facilius, quam felicius titillari possent. Quid? quod tyrannus trium litterarum, mos, solida etiam ingenia non raro adeo in transversum agebat, ut litteram Scripturæ res suas sibi habere juberent, contortasque allegorias studiosius, quam pru-

(*l*) Adposite PETRUS CUNÆUS: *Mysteria ex rebus quibusvis obviis & apertis effodere, eorum est, qui via hominum perulgata sapere fastidiunt.* De Republ. Hebr. L. III. c. v.

prudentius consecarentur. Nec diu Christianos suis lenociniis atq; suis blanditiis seduxerat allegoria, cum doctores supremi etiam subsellii eo stoliditatis de-laberentur, ut litteralem Scripturarum expositionem, tanquam putrem carnem, fastidirent allegorica vero interpretamenta ipsam Theologiae medullam constituerent. Nec hic substituit audacia, sed longius progressa impium illud placitum peperit, salutis jacturam facere, qui, fastiditis cupediis allegoricis, sensum Logicum in Scripturis exponendis paulo prestitus sequerentur. (n) Quoniam vero S. Sacra tam inconsulto artificio in nasum quendam cereum convertebatur, qui pro cuiusvis ingenio & judicio in varias formas fingi atque refungi posset; mirum non est, si profani animi homines exinde occasionem sumerent calumniandi doctrinam Christianam, quasi nihil certi, nihil firmi haberet, adeoque pari passu ambularet cum ineptis paganorum fabulis. Hoc certe a PORPHYRIO factum, accepimus, qui plenis maledicentiae velis passim in eandem invehitur. Nec aliam forte caussam is habuit, quamobrem, Sacris Christianorum

(m) Vere B. LUTHERUS: *Est allegoria tanquam forma meretrix, quae ita blanditur hominibus, ut non possit non amari, praesertim ab hominibus otiosis, qui sunt sine tentatione. Tales putant se in medio Paradisi & gremio Dei esse, si quando illis speculationibus indulgent.* Comment. in Gen. XXX.

(n) Hoc ORIGENI in mentem venisse, constat ex Libro X. Stromaton, apud CAROLUM DE LA RUE Tom I. Opp.

rum relictis, ad vomitum paganum redierit, quam quod in scriptis eorum verum demonstrandi nervum desideraret. Nec aliunde nobis derivandus videtur insanus allegorizandi pruritus, qui sectam pontificiorum etiamnum adfligit, ut nihil dicam de lue hujus mali, quæ ad nostrates etiam propagata reperitur.

§. XVI.

Non dubito fore multos, qui intemperias allegoricas, quibus Patres agitati fuerunt, potius arcessent ex more Judæorum & paganorum, quo illi Sacras Litteras, hi fabulas Deorum interpretabantur allegorice, quam ex imperitia Lingvæ Sanctæ, cum, apud eos usu receptum esse, invenient, ut hujusmodi subtilitates sèpius sectentur, in illis etiam locis Scripturæ, ubi versiones planum fundunt sensum, & nulla neque obscuritas, neque absurditas occasionem ineptiendi subministrat. Sed hi erunt fere, qui nescient, unius positionem alterius

p. 41. ubi hæc illius verba leguntur: *Multorum malorum occasio est, si quis in CARNE Scripturae maneat. Quae qui fecerint, regnum Dei non consequentur. Quamobrem SPIRITUM Scripturæ, fructusque quaeramus, qui non dicuntur manifesti. Vides quorsum infanæ optimam animam seduxerit hæc prima condæ ineptiarum.*

(o) Horum temeritatem false, sed apte perstringit POLYDORUS VIRGILIUS Libro IV. cap. IX. de Inventione Rerum, ubi, *vide*, inquit, *non secus illi Jurisconsulti aliquoties detorquent Sacras Litteras, quo volunt, ac furores sordidae solent dentibus extendere pellere.*

terius negationem non semper involvere. Hi si didicerint, in Scriptis Patrum innumeratas occurrere allegorias, in quas nunquam potuissent incidere, si textum Hebræum intellexissent, negare non poterunt, quominus *αινεθεασία* quandoque certam exorbitandi ansam præbuerit. Hoc facile nobis concessuros, arbitramur, quotquot exempla, quæ modo adducenda veniunt, ad tento animo consideraverint.

Primum Exemplum. Gen. XXXI: v. 41. Sic habet T. H. מִנִּים עֲשֹׂת מִשְׁכְּרַת וַיַּחַלְתָּ אֶת i. e. *Mutasti mercedem meam decem vicibus.* LXX: καὶ παρελογίσω τὰς μισθίους τις δέκα αὐρδῶν. i. e. *Decepisti mercedem meam decem agnibus.* Huic lacunæ inhaerens AUGUSTINUS ita argutatur, ut *decem agnas dicat decem tempora*, quibus pepererant oves, *quas sexennio paverat, quandoquidem anno singulo bis peperisse censem.* Cum vero sic non decem, sed duodecim numerarentur agnæ, siquidem JACOBUS tot annis LABANO serviverat propter gregem; ad conjecturas necesse habet confugere. Putat igitur, *oves primo sexennii anno semel partum edidisse, priusquam initum esset pactum, & JACOBUM a LABANO discessisse, antequam anno ultimo fætum deponerent.* Quæro autem, num hæ tricæ pio viro unquam in mentem venire potuissent, si notionem, quæ voci מִנִּים subest, percepisset, nec deceptus fuisset errore τῶν Εβδομήκοντα, qui, nescio qua metamorphosi, tempora in animalia transformaverant? (p)

K

Secun-

(p) Vide Quæstiones in Genesin, Quæst. XXXI.

Secund. Exempl. Num. XIX: v. 2. in T. H. hæc exstat sententia: זֶה קְרַת הַתּוֹרָה אֲשֶׁר צָוָה יְהוָה לְאַמְרֵי i. e. *Hoc est STATUTUM legis, quod præcepit Dominus dicendo.* Hic vocem קְרַת LXX. Interpretes per διασολήν, Latinus vero Vulgatus per distinctionem verterat. Sic igitur legit AUGUSTINUS: *Hæc est DISTINCTIO legis, quæcunque constituit Dominus.* Exinde autem ope allegoriæ extorquet distinctionem inter duo Testamenta, quam in passione Domini nostri JESU Christi ponit. (q)

Exempl. Tertium. Psalm. XVII: v. 14. T. H. סִבְכָּעוּ יְשָׁבָעֻ i. e. *Saturabuntur filii.* LXX. Senes: Εχοεπίσθησαν γάρ i. e. ut habet Vulgatus, qui eos, pro more, presse sequitur, *Saturati sunt filii.* Hic itidem liberis allegoriæ spatiis evagatur ingeniosus HIPPONENSIMUM EPISCOPUS, per filios intelligens opera, & quidem per bonos filios bona opera, & per malos mala. Potest vero quidquam cogitari alienius? Sed indagemus viam, qua bonus Pater in has argutias inciderit. Consuluerat veterem quendam

(q) Verba ejus Quæst. XXXIII. in Numeros ita sonant: *Si haec est distinctio legis, quæcunque præcepit Dominus, procul dubio magna DISTINCTIO.* Et certe intelligitur duo Testamenta distingvere. Temporalium autem bonorum, & carnalium, & spiritualium, & aeternorum, quae clarior & certior distinctio est, quam passio Domini nostri JESU Christi. Hanc ergo passionem D. N. I. C. tanquam DISTINCTIONEM duorum Testamentorum, hoc quod de juvencie rufae mactatione narratur, satis congrue præfiguratur. Hic adpositæ quis dixerit: *HÆC EST DISTINCTIO INTER HEBRAICE PERITUM & HEB-*

dam codicem, qui, pro *filiis*, habuit *porcina*, (r) quam quidem legendi rationem etiamnum servat Psalterium Romanum. Sic igitur illud interpretatus est: *Saturati sunt porcina*, id est, *Saturati sunt immunditia, conculcantes margaritas sermonis Dei*. Quoniam igitur duplarem hanc lectionem offendebat, nec textum Hebraeum consulere poterat, utra earum veritati vicinior esset, hoc opus hic labor erat adcurate definire. Hinc utramque retinuit, & utramque eodem modo explicuit, ne forte meliorem repudiaret, deteriorem vero adoptaret.

Exempl. Quartum. Psalm. CXXVIII: v. 2. T. H. יִצְעַר כְּפִיר כִּי תָאכֵל i. e. laborem MANUUM tuarum quia comedes. LXX interpretes: τὰς πάντας λόγων τὰς φάγεσσι i. e. Labores CARPORUM tuorum comedes. Vulgatus: *Labores manuum tuarum quia manducabis*. Veteres non nulli codices: *Labores FRUCTUUM tuorum comedes*. Hic iterum allegoriae habenas laxat AUGUSTINUS, subtilius, quam solidius inter labores fructuum & fructus laborum distinguens.

K 2

BRAICE IMPERITUM. Nam longa haec pompa orationis, et si amabilem spiret pietatem, soliditatis tamen ne hilum quidem habet. Vox enim Hebraica בְּרִית, quam Graeca διασολή & Latina DISTINCTIO exprimere debuisset, non distinctionem, sed STATUTUM significat.

(r) Tò *porcina* Latinorum Codicum originem debere videtur vitio Librarii, qui τὸ ιῶν per oscitantiam in τῷ νέον mutaverat, eodem modo, quo Psalmo LXXXIX: v. 37. pro χρόνος scriptum fuit ἡγέρες, & Psalmo CXXXII: v. 15. χηραὶ pro ἡγεῖαι. Alii ιῶν legerant, unde EUTHY-

stingvens. Verba ejus sic sonant: *interim modo labores fructuum, postea fructus laboris.* Manducabunt labores fructuum, qui euntes ibant & flebant, mittentes semina sua. Quanto jucundius manducabunt fructus laborum, qui venientes venient cum exultatione, portantes manipulos suos. Arguta, sed aliena interpretatio. Fraudi pio Patri fuit partim imperitia interpretis, qui Græcam vocem, Καρπῶν, (s) Latina, FRUCTUUM, expresserat, partim inscitia descriptoris, qui glossam margini illitam in ipsum textum intrusisse videtur. (t) Illa sensum formulæ depravavit, hæc depravatum multiplicavit. Neutrū horum accidere potuerat, si vim vocis, כְּפִיר, probe intellexisset, nec turbidis versionum rivulis coactus fuisset inhærere.

Exempl.

MIUS haust suum *Saturati sunt porcis*, quoū interpretatur, *Saturati sunt immunatiis, consumto nimirum patrimonio ac bonis omnibus, in varias voluptates*, apud S. AM. I. c. p. 551.

(s) Vox καρπὸς ambiguitate laborat. Significat enim & FRUCTUM & CARPUM, seu juncturam minus & brachii. Αριστοτελες de ζιζησ ρη βγαχ νυγ, καρπὸς, inquit ARISTOTELES Lib. I. de part. anim. Synecdochice manum significat, atque in ea significatione a LXX Interpretibus adhibetur, quod cum Latini non perspicerent, Hebraismi lumine destituti, notioni fructuum perperam inhæserunt.

(t) Cum formulam *manducare labores fructuum, minus aptum sensum fundere* viderent lectores, accidit, ut non nemo, commodioris explicationis gratia, ordinem vocum per ὅπαλλαγην inverteret, in margine scribens: *fructus laborum manducabis.* Hanc glossam in ipsum textum intrusisse videntur librarii, quibus forte visa fuit emendatio-

Exempl. Qu'ntum. Psalmo CXXVII: v. 4. verba T. H. בְּנֵי הַגּוֹיִם i. e. adolescentuli, male Græci νεοί ἐνελωγυέων, & Latini filii excusorum transtulerunt. Hinc vanissimæ allegoriae. AUGUSTINUS Excusos Prophetas & FILIOS EXCUSSORUM Apostolos interpretatur. HILARIUS per Excusos intelligit Apostolos & per FILIOS EXCUSSORUM homines credentes. EUTHYMIUS Excusos exponit quos cunque fideles doctores, & FILIOS EXCUSSORUM horum spirituales filios credentes. Omnes vero tota linea a mente auctoris aberrant, puram fontis undam negligentes, & fatuam rivulorum vappam sorbillantes.

§. XVIII.

HÆc pauca adduxisse sufficiat de nœvis, qui Theologiam Patrum Exegeticam deformarunt. Jam, ut fidem superius datam liberemus, ſphalmata eorum Dogmatica breviter perstringere volumus. Hæc vero in duas abeunt classes. Geminum enim effectum apud Patres habuit ignoratio Hebraismorum. Nam quisquis Scripta eorum vel fugitivo lustraverit oculo, non poterit non deprehendere, quod partim genuinam Ecclesiæ doctrinam ineptis atque infirmis adstruxerint argumentis, partim ex oraculis male perceptis nefanda

K 3

erro-

nem, vel completionem textus continere, perinde ac si mutilata fuissent exemplaria, quæ priorē tantum lectionem adgnoscerent. Sic errores erroribus cumulantur, cum, inconferto textu Authentico, vagis versionum verbis temere adhibetur fides.

errorum monstra procuderint. Quod prius attinet, toties locum invenit, quoties articulis fidei probandis talia Scripturæ dicta adhibent, quæ, cum ad lucem Hebraismi examinantur, nihil minus probare deprehenduntur, quam id, cuius gratia adferuntur, unde religio non potest non calumniis atque contumeliis adversariorum exponi. (u) Hoc itidem luculentis quibusdam exemplis ad oculum demonstrare conabimur, quæ potissimum desumpturi sumus ex articulo de Christo, qui totius & Scripturæ & Theologiæ nucleus, medulla & centrum est.

Exemplum Primum Num. XXIII: v. 19. T. H. לֹא אִישׁ אָל וַיְצֹב וּבֶן אָמֵם וַיְהִנְחֵת i. e. Deus non est vir, ut MENTIATUR, nec filius hominis, ut POENITENTIA DUCATUR. His verbis luculentum vaticinium de venerando crucis mysterio contineri, putavit LACTANTIUS. Nec mirum. Usus enim est Codice, in quo Hebraica sic translata fuerunt: *Non quasi homo Dominus SUSPENDITUR, neque quasi filius hominis MINAS PATITUR,* vel

(u) Vere THOMAS: *Cum quis ad probandam fidem Christianam inducit rationes non cogentes, cedit in irrationem infidelium. Credunt enim, quod hujusmodi rationibus innitamur, & propter eas credamus.* In Summa Part. I. Quæst. XXXII. Art. I. Recte etiam ISIDORUS PELUSIOTA observavit de illis, qui omnia Vet. Test. dicta promiscue ad Christum referunt, quod gentilibus & hæreticis, qui id repudiant, in sua adversus nos concertatione robur & arma suppeditent. *Τὰ γὰρ μή τις αὐτὸν εἰημέα εἰθιαλγεῖον, καὶ τὰ αβιάσως*

vel ipse sic transtulit versionem septuaginta Interpretum, qui hoc modo veritatem Hebraicam corruerant. Nam וְיָכֹב, Ut MENTIATUR, per τὸ διαρτῆσαι, ut SUSPENDATUR, & וַיִּתְנַחֵם τὸ ἀπειλῆσαι, ut POENITUDINE TANGATUR, per τὸ ἀπειλῆσαι, ut MINAS PATIATUR, in illorum interpretatione redditum legitur. (v)

Secund. Exempl. Deut. XXVIII: v. 66. T. H. וְהִיו חַיָּךְ תְּלָאִים לְךָ מְנָגֶר SUSPensa coram. His verbis etiam de crucifixione Sospitatoris vaticinatum fuisse Mosen, sibi persuaserunt multi veterum Ecclesiæ doctorum, & inter hos lucida illa sidera IRENÆUS, (w) LACTANTIUS, (x) TERTULLIANUS &c. (y) Hi enim in disputationibus atque concertationibus adversus infideles, Judæos & paganos, non dubitarunt ad hunc

εἰρημένα ὑποτείνεσθαι παρασκευάζεσθαι. Nam dum ea, quae ac ipso minime dicta sunt per vim intorquent, hoc efficiunt, ut quae de eo haudquaquam contorte dicta sunt, in suspicitionem veniant. Libr. II. Epist. CXCV. pag. 215. Confer. JOH. JAC. RAMBACHII Instit. Hermen. Sacr. Lib. II, cap. IV. p. 166.

(v) Divin. Instit. adversus gentes Lib. IV. cap. XVIII. ubi plura Scripturæ dicta majori devotione, quam eruditione in rem suam detorquet.

(w) Lib. IV. cap. XXIII.

(x) Instit. Divin. Lib. IV. cap. XVIII. p. m. 221.

(y) Lib. adversus Judæos cap. XI. Hic de suo addit voces IN LIGNO. Erit vita tua, inquit pendens in ligno ante oculos tuos & non credes vitae tuae, quasi dicat, Christus, qui est vita tua, suspensus erit ante oculos tuos in cruce,

hunc locum, tanquam ad validissimum quoddam propugnaculum configere, quamvis in eo de Christo nihil omnino contineatur, ut ex collatione antecedentium & consequentium constat. Nam qui eam instituere volet, facile inveniet, hac formula nihil aliud innui, quam maximum vitæ periculum, vel saltem statum timoris atque mœroris plenum, qualem experiuntur, qui, violata lege divina, severam Numinis vindictam incurront.

(z) Nec alium verbis sensum subesse, colligi potest ex iis, quæ sequuntur: *timebis nocte dieque, & non eris certus de vita tua; mane dices utinam esset vespera, & vespera dices, utinam esset mane.* Hæc enim statum impiorum adhuc luculentius ob oculos ponunt. Nam non est pax impiis, & nullus locus

¶ non credis ei, qui est vita tua. Observes, locutionem, **לֹא תַאֲמִין בְּחִיר**, non involvere negationem fiducialis apprehensionis objecti salvifici, meriti scilicet CHRISTI, sed privationem certitudinis de unione mentis atque corporis. Hinc rectius redditur, *incertus eris de vita tua*, quam *non credes vitae tuae*, adeo ut sensus sit, *ne minimo quidem momento tibi polliceri poteris, quod in vivis esse perseveres.*

(z) Hæc quidem loquendi ratio coincidere videtur cum formula Latinorum, *suspensu atque sollicito esse animo.* Illustrationis gratia hie adponere placet verba Ciceronis ad Atticum Lib. I. Epist. XVIII. quæ sic habent: *Accipi aliquot epistolas tuas, ex quibus intellexi, quam SUSPENSO ANIMO & SOLLICITO scire averes, quid esset novi. Accipe vero quid esset. Tenemur, pergit, undique, neque jam, quoniam serviamus, recusamus, sed mortem & ejctionem, quasi majora, timemus.*

locus tutus, nulla hora secura, nulla creatura fidelis. (a) Atque hinc distincte intelligitur, veritatem passionis Domini ex hoc dicto nihil roboris adquirere.

Tertium Exempl. Psalm. XCVI: v. 10. T. H. אָמַרְתִּי בְּגֹויִם וְהָוָה מֶלֶךְ i. e. *Dicite inter gentes, Dominus regnat.* Hic locus in Græco exempliari, quo JUSTINUS MARTYR usus fuit, adjectas habuit voculas, εἰς ξύλον, de ligno. Hinc factum, ut Patres in adstruenda passione Dominica hoc oraculum quam frequentissime & confidentissime adducant, quamvis nervus probationis totus quantus in adiuta ista lacinia situs sit, nec quidquam roboris habeat ad evincendum id, quod in questionem venit. Hujusmodi imprudentiae postulandi sunt LACTANTIUS, TERTULLIANUS, AUGUSTINUS, ARNOBIUS, CASSIODORUS &c.

Quartum Exempl. Psalm. XCIX: v. 5. T. H. וְהַשְׁתַּחֲוו לְהָרָם גָּלִיל i. e. *Et adorate, seu incurvate vos, ad SCABELLUM PEDUM IPIUS.* Hic minus accurate veritatem Hebraicam expresserunt interpres. Septuaginta Seniores transtulerunt: καὶ προκυψίτε τῷ σπουδιῷ τῶν πόδων αὐτοῦ, & vulgatus: *Adorate scabellum pedam ejus.* Utrobique objectum adorationis constituitur ipsum scabellum. Hinc cum AUGUSTINUS ex Esaiae cap. LXVI. didicisset, terram Dei scabellum esse, eamque adorationis cultu prosequi nefas intelligeret, inops consilii ad allegoriam

L

goriam

(a) Vide B. Lutheri Tom. III, Jen, Lat, f. 124. ad Deut. XVII,

goriam confugit, eaque magistra Christum ex alieno hoc oraculo ingeniose, sed perverse exsculpit. Facilius rem expedire potuisset, si vim præpositionis **ל**, ad, juxta, intellexisset, nec necesse habuisset cæcam fidem adhibere interpretibus, qui eam hoc loco pro nuda nota casus dandi habuerunt. (b)

Quintum Exemplum. Psalm. CX: v. 3. T. H. עַטְנָה נֶרְכֹת בֵּין חִילָקָה i. e. *Populus tuus erit summe spontaneus in Die exercitus tui.* LXX. Interpretes: Μετὰ σὺς αἴγχνι ἡ ἱδέα τῆς διάμεσος σὺς. Vulgatus: *Tecum PRINCIPUM in die virtutis tuae.* Hic Græci vocem עַטְנָה legerunt *immeka*, quod tecum valet, pro *ammeka*, quod *populos tuus* dicit. Vim vero nominis נֶרְכֹת, quod *spontaneitates* significat, cum ignorarent, ex cognato נְרִיבִים, *principes*, confessim notionem *principatus* deduxerunt, quam voce αἴγχνι expresserunt. Hoc simplex erat erratum.

Latini

(b) *Videte, inquit, fratres, quid nos jubeat adorare. Alio loco Scriptura dicit, COELUM MIHI SEDES, TERRA AUTEM SCABELLUM PEDUM MEORUM. Ergo terram nos jubes adorare. Et quomodo adorabimus terram, cum dicat aperte Scriptura, DOMINUM DEUM TUUM ADORABIS, & hic dicit, ADORATE SCABELLUM PEDUM EJUS? Item: Timeo adorare terram, ne me condemnaret, qui fecit caelum & terram. Rursus timeo non adorare SCABELLUM PEDUM DOMINI MEI, quia Psalmus mibi dicit, ADORATE SCABELLUM PEDUM EJUS. Filius Huans converto me ad CHRISTUM, quia ipsum quaero hic, & invenio, quomodo sine impietate adoretur terra & SCABELLUM PEDUM EJUS. Suscepit enim de terra terram, quia caro de*

Latinus vero cum reputaret, hanc vocem s̄ampissime *principium* denotare, eam quoque *principium* interpretatus est. Atque sic duplex erat peccatum. Jam vero cum Patres Hebraica ignorarent, dijudicare non poterant, recte ne, an secus transtulissent interpretes. Hinc pro certo habuerunt, genuinum esse interpretamentum, *Tecum principium*. Atque exinde æternitatem & divinitatem Salvatoris demonstrare tentarunt, sed ridicule, sed misere. Nam his verbis ne ἦν quidem inest, unde tale quid exsculpi possit, si ad fidem fontium exigantur. (c)

Sextum Exemplum 1. Sam. XXI:v. 14. T. H. נָהָלְלַ בִּירָם i. e. Et *insanum* se fingebat in manib⁹ ejus. Hic observamus duplēm errorem, alterum, quo verbo insaniendi significationem ferendi tribuerunt, alterum, quo pronomen *אַתָּה*, plurale, in *אַתָּה*, singulare, transmutarunt. Audiamus vero quam præclaram doctrinam ex binis istis

L 2

nævis

terra est, & de carne MARIE carnem accepit. Et quia in ipsa carne hic ambulavit, & ipsam carnem nobis manducandam ad salutem aedit, nemo autem carnem manducat, nisi prius adoraverit, inventum est, quomodo adoretur tale SCABELLUM PEDUM Domini, & non solum non peccemus adorando, sed & peccemus non adorando. Vides quid sit Hebraica ignorare.

(c) Recht ist es geredet, daß CHRISTUS GOTTES SOHN ist. Aber wie spöttlich lautet es in den Ohren der Widersacher, da sie desz Grund führen aus dem 110. Psalm: *TECUM PRINCIPIUM in Die virtutis tuae,* so doch daselbst in der Ebräischen Sprache nichts von der Gottheit geschrieben stehe. Tom. II. Germ. p. 459.

nævis elicuerit ingeniosissimus AUGUSTINUS. ET
 FEREBATUR inquit, MANIBUS SUIS. Hoc vero, fratres,
 quomodo fieri possit in homine, quis intelligat? Quis
enim, PORTATUR IN MANIBUS SUIS? Manibus aliorum
 potest portari homo; manibus suis nemo portatur.
Quomodo intelligamus in David secundum litteram,
non invenimus: in CHRISTO invenimus. FEREBATUR
 ENIM CHRISTUS IN MANIBUS SUIS, quando commen-
 dans ipsum corpus suum, ait, HOC EST CORPUS MEUM.
 Ferebat enim illud corpus in manibus suis. Miseret
 me optimæ animæ, quæ ignoratione Lingvæ San-
 ctæ eo ineptiarum coacta fuit progredi! Sexcenta
 hujusmodi exempla primum esset adducere, si an-
 gustiæ pagellarum caperent; quoniam vero vel ex
 his paucis fatis sibi constat veritas adassertionis no-
 stræ, pluribus adlegandis supersedemus, ad mo-
 mentum, quod restat, pergentes.

§ XIX.

Superest vero, ut certis rerum documentis osten-
 damus verum esse, quod diximus paulo
 superius, nefanda opinionum portenta ex *ave.*
Beaatis Patrum originem duxisse. Ex densa
 exemplorum sylva loco speciminis paucissima pro-
 duxisse sufficiat, eo ordine, quo se quodlibet me-
 moriaæ obtulerit.

I. Error. *Alium mundum invisibilem multis secu-*
lis ante hunc nostrum visibilem creatum fuisse, atque
in eo angeles, falso sibi persuaserunt multi Patrum,
utpote ORIGENES, BASILIUS, NAZIANZENUS,
AMBROSIUS, HIERONYMUS, ISIDORUS, DA-
MASCE-

MASCENUS, CASSIANUS, alii. (d) Hoc vero ad-
structum iverunt his verbis Mosis Gen. II: v. 8.
גַּן־בְּעֵרָן מִקְרָא יְהוָה אֱלֹהִים i. e. Et plan-
taverat Dominus Deus hortum in EDEN AB ORIEN-
TE quæ verba ideo huic errori vel gignendo vel fo-
vendo apta sunt visa, quod male fuerunt translata.
Nam וְעֵדָן, in Eden, reddiderunt appellative, volupta-
tis, & וְעֵדָן, ab oriente, transtulerunt, a principio.

II. Error. Angelos cum feminabus coitum cele-
brare posse, & consequenter corporibus gaudere. Hoc
delirium originem traxit ex Gen. VI: v. 2. ubi
pro γένεσι τοῦ Θεοῦ, filii Dei, in quibusdam codicibus le-
ctum fuit, ἄγγελοι τοῦ Θεοῦ, angeli Dei. In hoc luto
hæserunt JUSTINUS, CLEMENS, LACTANTIUS,
(e) METHODIUS, EUSEBIUS, TERTULLIANUS,
SULPICIUS, ceteri.

III. Er-

(d) Vide SIXTI SENENSIS Biblioth. Sanct. Lib. V.
Annot. 5. & SIXT. AMAMA Ant. Bibl. Lib. II, p. m. 196. 197.

(e) Hunc Patrem audire lubet de hac re prolixe, sed
erronee differentem. Cum, inquit numerus hominum cœ-
pisset increscere, providens Deus, ne fraudibus suis Diabolus,
cui ab initio terrae dederat potestatem, vel corrumperet, vel
dispergeret homines, quos in exordio fecerat: misit angelos ad
tutelam, cultumque generis humani. Quibus praecepit ante o-
mnia, ne terrae consagratione maculati, substantiae caelestis amitt-
terent dignitatem, scilicet id eos facere prohibuit, quod scie-
bas esse facturos, ut veniam sperare non possent. Ita illos
cum hominibus commorantes dominator ille terrae fallacissimus
consuetudine ipsa paulatim ad vitia pellexit, & mulierum con-
gressibus inquinavit. Tum in caelum, ob peccata, quibus se im-
merserant, non recepti, ceciderunt in terram. Sic eos diabolus
ex angelis Dei fecit suos satellites. Instit. Div. Lib. II. cap.
XV. De reliquis consulantur auctores nuper laudati.

III. Error. *Ex consuetudine angelorum cum feminabus natum fuisse genus quoddam dæmonum, medium gerens naturam inter patres atque matres, ex quibus procreati fuerant, ut LACTANTIUS fabulatur.* (f) Errandi occasionem subministrabat vox נָפִילֵי־, quæ cit. cap. v. 4 occurrit. Nam cum vim hujus nominis non inteligerent, inhærebant notioni, quæ in fabulis gentilium nomini Græco γίγαντες, tributa reperiebatur, quo Hebræum נָגִילֵי־ transtulerant LXX. Interpretes, atque sic ex cerebro ipsorum, quæ diximus, monstra prodierunt.

IV. Error. *Quosdam homines justificari operibus legis.* Hoc statuit HIERONYMUS ex occasione verborum Pauli, Rom. III: v. 20. ἐξ ἑρων νόμου καὶ δικαιώθησον πάντα οὐαξ. Non justificabuntur, inquit, omnes, justificabuntur vero aliqui. Comment. in Eph. I.

Plures hujusmodi errores cūmulare non placet, cum ex iis, quos jam paucis tetigimus, haud obscure constet, quam necessaria sit peritia Hebraismi, si quis ad solidiorem Theologiæ cognitionem adspirare voluerit, quamq; stulte faciant, qui hoc genus eruditio-
nis ideo elevare conantur, quod doctores Ecclesiæ pri-
mitivæ aut valde manca, aut plane nulla ejus-
dem notitia imbuti fuerunt.

(f) Loc. cit. ita pergit: *Qui autem sunt ex his procreati, quia neque angeli, neque homines fuerunt, sed medium quandam naturam gerentes, non sunt ad inferos recepti, sicut in caelum parentes eorum. Ita duo genera dæmonum facta sunt, unum caeleste, alterum terrenum. Hi sunt immundi spiritus malorum, quae geruntur, autores &c*

